

210

Vischnaunca da Mustér

Lescha da scola

2015

I. Disposiziuns generalas

- | | | |
|------|---|---------------------------------|
| Art. | 1 | Scalems da scola |
| | 2 | Obligaziun dad ir a scola |
| | 3 | Uras da bloc |
| | 4 | Structuras dil di |
| | 5 | Purschidas supplementaras |
| | 6 | Purschida da pedagogia speciala |
| | 7 | Giudicament e promozion |
| | 8 | Lungatg da scola |

II. Persunas d'instrucziun

- | | |
|---|-------------------------|
| 9 | Relaziun d'engaschament |
|---|-------------------------|

III. Direcziun da scola

- | | |
|----|---------------------------|
| 10 | Relaziun d'engaschament |
| 11 | Obligaziuns e cumpetenzas |

IV. CussegI da scola

- | | |
|----|---------------------------|
| 12 | Organisaziun, protocols |
| 13 | Habilitad da decider |
| 14 | Obligaziuns e cumpetenzas |
| 15 | Presidi |

V. Dretg da recuors

- | | |
|----|---------|
| 16 | Recuors |
|----|---------|

VI. Disposiziuns finalas

- | | |
|----|-------|
| 17 | Vigur |
|----|-------|

Sebasond sin artechel 20 dalla lescha davart las scolas popularas dil cantun Grischun (lescha da scola) dils 21 da mars 2012 relai la vischnaunca da Mustér, sin fundament da sia constituziun communal, suandonta lescha:

I. Disposiziuns generalas

Art. 1 Scalems da scola

¹La vischnaunca da Mustér meina ils suandonts scalems da scola:

- a) scalem da scoletta
- b) scalem primar
- c) scalem secundar I

²Per affons da lungatg jester eis ei obligatori da frequentar la scoletta.

Art. 2 Obligaziun dad ir a scola

L'obligaziun dad ir a scola sedrezza tenor il dretg cantunal e la frequentaziun ei gratuita.

Art. 3 Uras da bloc

La vischnaunca garantescha las uras da bloc prescrettas dil cantun sil scalem da scoletta e sil scalem primar.

Art. 4 Structuras dil di

La vischnaunca porscha en cass da basegns structuras dil di supplementaras.

Art. 5 Purschidas supplementaras

¹ En cass da basegns sa la vischnaunca scaffir ulteriuras purschidas sco lavour sociala da scola ni purschidas da timeout.

² Sche necessari installeschan las instituziuns responsablas per la scola purschidas specialas per scolars cun talents extraordinaris.

Art. 6 Purschida da pedagogia speciala

La vischnaunca ei responsabla per ordinar e realisar mesiras da pedagogia speciala sil sectur sempel.

Art. 7 Giudicament e promoziun

II giudicament sco era la promoziun e la midada da scalem dils scolars sedrezzan tenor il dretg cantunal.

Art. 8 Lungatg da scola

Il lungatg da scola ei romontsch sursilvan.

II. Persunas d'instrucziun

Art. 9 Relaziun d'engaschament

¹Las persunas d'instrucziun ein emploiadadas dalla vischnaunca.

²Observond il dretg cantunal vegn la relaziun d'engaschament dallas persunas d'instrucziun francada en in contract dil dretg public.

III. Direcziun da scola

Art. 10 Relaziun d'engaschament

¹Il meinascola ei in emploiau dalla vischnaunca.

²Observond il dretg cantunal vegn la relaziun d'engaschament dil meinascola francada en in contract dil dretg public.

Art. 11 Obligaziuns e cumpetenzas

Las incumbensas dil meinascola ein enumeradas el diagram da funcziuns. El meina operativamein la scola surtut els secturs da pedagogia e da pedagogia speciala, dil personal, dall'organisaziun, dall'administraziun e dallas finanzas.

IV. Cussegl da scola

Art. 12 Organisaziun, protocols

¹II cussegl da scola consista da tschun commembers. El vegn menaus dil president dil cussegl da scola. El seconstituescha sesez.

²II commember da suprastonza incumbensaus cul scolaresser ei ex officio commember dil cussegl da scola.

³La vischnaunca da Medel sa delegar in representant el cussegl da scola.

⁴Il cussegl da scola vegn convocaus dil president aschi savens sco las fatschentas pretendan ni sch'in commember pretenda quei.

⁵Il meinascola fa part dallas sedutas dil cussegl da scola cun vusch consultativa. Eis ei indicau sa il cussegl da scola envidar allas sesidas ulteriuras persunas cun vusch consultativa.

⁶Davart las sedutas sto vegnir menau in protocol.

Art. 13 Habilitad da decider

¹Il cussegl da scola sa prender decisiuns sche silmeins treis commembers ein presents. Scadin commember dil cussegl da scola che assista allas sedutas ei obligaus da votar.

²En cass da paritat da vuschs dat il president la decisiu da tagl.

Art. 14 Obligaziuns e cumpetenzas

¹II cussegl da scola meina e survigilescha il menaschi da scola ed exequescha la legislaziun cantunala e communal da scola. El ademplescha tut las incumbensas sil sectur dalla scola ch'ein buc adossadas ad in'autra autoritat ni ad in'autra instanza entras decrets cantunals ni communals.

²El ha cunzun l'incumbensa da

1. decider davart l'anticipaziun respectivamein davart la suspensiun dall'entschatta da scoletta e dalla scola (scalem primar);
2. decider davart la cuntuaziun digl onn da scola en ina classa inferiura, sch'in affon ei surdumandaus;
3. decider davart il sursiglir ina classa;
4. decider davart purschidas supplementaras per affons da lungatg jester;
5. ordinar ed abolir mesiras da pedagogia speciala sil sectur sempel;
6. exclauder in affon dalla scola duront il temps da scola obligatori;
7. decider davart la relaschada anticipada d'in affon sil pli baul suenter otg onns da scola obligatoris;
8. decider davart la frequentaziun d'ulteriurs onns da scola suenter il temps da scola obligatori;
9. exclauder in affon dalla scola duront il temps da scola postobligatori;
10. decider davart la recepziun d'in affon d'in auter pertader da scola e fixar il daner da scola corrispudent;
11. decider davart il diember da lecziuns annual proponius dalla direcziun da scola;
12. decider davart occurrenzas da scola specialas, dis da sport ed jamnas da project;
13. fixar las vacanzas – tenor lescha cantunala - en entelgiantscha ed en coordinaziun culs cussegls da scola dalla regiun sco era declarar occurrenzas da scola specialas sco obligatorias duront ils suentermiezd libers ni las sondas;
14. approbar ils transports da scola - l'organisaziun surpren la direcziun da scola;
15. relaschar in reglament davart absenzas e congedis;
16. relaschar in uorden disciplinar;
17. engaschar e relaschar las personas d'instrucziun, la direcziun da scola, gidonters ed ulteriur persunal da scola (excl. pedels);
18. relaschar in carnet da duers per la direcziun da scola;
19. relaschar in reglament davart la formaziun supplementara e davart il congedi da formaziun supplementara dallas personas d'instrucziun e dalla direcziun da scola;
20. sancziunar cuntravenziuns enviers igl art. 68 dalla lescha cantunala da scola;
21. suttametter ina proposta pertucccont il preventiv e las finanzas da scola per mauns dalla suprastonza communalda ed impunder ils mieds concedi;
22. decider davart expensas unicas e buca previdas el preventiv entochen frs. 2'000.00 per onn;
23. eleger il dentist ed il mieri da scola;
24. relaschar ulteriurs reglements ed uordens en stretg connex cul menaschi da scola.

Art. 15 Presidi

- ¹ Il president dil cussegl da scola representa il cussegl da scola anoviars, prepara las fatschentas dil cussegl da scola e procura per l'execuziun dils conclus decidi.
- ² En cass urgents che pertuccan il camp da cumpetenzas dil cussegl da scola pren el las mesiras necessarias. Tenor pusseivladad decida il cussegl da scola definitivamein en caussa a caschun da sia proxima sesida.

V. Dretg da recuors**Art. 16 Recuors**

- ¹ Encunter disposiziuns e decisiuns dallas persunas d'instrucziun, dalla direcziun da scola e dil president dil cussegl da scola sa vegnir recurriu tier il cussegl da scola enteifer 10 dis.
- ² Encunter disposiziuns e decisiuns dil cussegl da scola en fatgs da scola sa vegnir fatg recuors tier il Departament d'educaziun, cultura e protecziun digl ambient dil Grischun enteifer 10 dis, num che la lescha cantunala da scola prevedi enzatgei auter.
- ³ Encunter decisiuns d'assignaziun negativas e disposiziuns da buca promover respectivamein da promover sa vegnir fatg recuors tier igl uffeci cantunal per la scola populara ed il sport enteifer 10 dis. Igl uffeci sa preveder ina procedura speciala per giudicar il recuors.

VI. Disposiziuns finalas**Art. 17 Vigur**

- ¹ (Cunquei ch'igl ei buca vegniu instradau in referendum, passa la lescha en vigur igl 1. d'uost 2015 suenter l'approbaziun dil Departament d'educaziun, cultura e protecziun digl ambient dil Grischun.)
- ² Cun l'entrada en vigur da questa lescha vegnan tuttas prescripziuns communalas che stattan en cuntradicziun cun ella cassadas, specialmein la lescha communal da scola dils 02 da zercladur 2002 sco era igl uorden disciplinar per las scolas dils 07 da fevrer 2002.

Approbau dil cussegl da vischnaunca Disentis/Mustér ils 27 da fevrer 2015.

Il president communal:

Francestg Cajacob

Il canzlist communal:

Andri Hendry

Approbau dil Departament d'educaziun, cultura e protecziun digl ambient dil cantun Grischun tenor disposiziun dil departament nr. 2096 dils 10 d'avrel 2015.

Il cau dil departament e president della Regenza:

Martin Jäger